

粟

香

三

筆

序

急景將闌旅愁若痾命嘯誰應索之蠹函推敲旣劬潤以蠟沫蕭晨攬物踽踽寡愉永夜懷人寥寥可數淮生同轉遠致尺一古誼相勗風雨矢以千秋新製哀然雲霞爛其五色稽核有據循覽忘疲服夢溪之淹貶驚枚生之神速猶憶西城僦廡深巷連牆春指綠楊香尋紫葛君出二筆索序簡端塵事坌擾久負譖責曾不一歲三筆復成若忘簿領之勞獨擷縹緲

之秀馨譽一播縞紵紛投瑤想忽開山川若迓于以
稽掌故于以采風謠非特妍詞雋什乞牋管之靈抑
且奧旨淵情闢榛芳之障豹窺斑而畧見狐集腋以
稱珍著錄何疑先睹爲快如僕者亦嘗行萬里結眾
流睨壇坫列幕府而江山莫助海神先避長康琴笙
寂如時彥咸癡王湛鸞披鯉庭之傳誦多在高門雞
鳴狗盜之行徑甯爲逐客又何必攬摭義山追逐鄭
氏徒遭捧腹見謂膩顏哉且夫簿書期會令典也而

逸士鄙以風塵關河行役壯遊也而孝子瞻懷岵屺
君方著桓寬之論補東晉之詩猶復剏緝風雅綱羅
散失從容著述見官事之裕如結納俊髦啟親顏之
莞爾藉供談薈遠媿語林撫我平生謬不敏矣噫嘻
世事杞憂人才筭長上未得立朝諫諭策攘外之勛
次未能閉戶研精爭名山之席日月旣逝五官所以
累歛竹素爲寶殷基以之勵志如斯集者未必立不
朽之業爲必讀之書而五百年後定識姓名十二時

中藉澆塊壘柱手版以迎朝爽陳酒脯以祭新篇宦
海沄沄亦足豪哉惜乎如僕庸下僭作弁言嘗鼎雖
識旨馨買櫝未名寶貴退毫欲脫臘鼓頻催悟我楫
香供君珮笑雙魚迢遞到及花田放棹時也

光緒甲申東坡生日山陰陳陔謹序

栗香三筆卷一

江陰 金武祥

淮生

管韞山侍御云人情貴古而賤今獨於撰郡邑志則相反人物藝文宋以上什之二三明以來什之七八余謂凡修郡邑志且將二十二史檢閱一過凡係本郡本邑名宦人物皆應全錄其本傳再取唐宋以來如李杜韓柳樂天永叔東坡山谷半山放翁諸大家詩文集及文選文粹文苑英華全唐詩宋詩鈔等書

所載有與其地其人其宦相涉者概行摭輯然後旁及歷代類書說部及各名家撰述再益以郡邑前輩中好古之士蒐輯攷據著有成書者取博擇精一正從前簡陋之失至近代當取其卓然可傳者著之不以繁蕪爲貴也

江陰縣志脩於光緒戊寅年繆筱珊太史近撰江陰沿革考並表由都門寄示先刻於此以俟他日脩志者採錄焉

江陰沿革考

江陰古延陵邑自吳季札避位而耕封於延陵遂爲

季子所居史記集解三十一引皇覽延陵季子冢在毘陵暨陽鄉至今吏民皆祀事楚考

烈王封黃歇爲春申君又爲春申君之采邑

輿地紀勝九引

江陰志云楚考烈王封黃歇爲春申君請地於江東於是城吳故墟以爲郡邑故今因春申爲號者居多如申港黃田港君山黃山之屬是也秦屬會稽郡以爲延陵鄉漢置毘

陵縣又析置暨陽鄉

元和郡縣志本漢昆陵縣之溉陽鄉

晉武帝太康

二年平吳置暨陽縣

按晉志昆陵郡吳分會稽無錫已西爲屯田置典農校尉太康

二年省校尉置毘陵郡而沈約宋志亦云太康二年分無錫毘陵立元和志同則是毘陵之置郡與暨陽

之置縣同在

咸康七年析暨陽置南沙縣按沈約宋

志南沙本

吳縣司鹽都尉署吳時名沙中吳平立暨陽縣割屬之咸康七年罷鹽署立爲南沙縣屬晉陵郡

梁

敬帝太平元年置江陰郡改暨陽爲江陰縣徙治君

山之陽

按陳志據寰宇記及輿地廣記云梁分蘭陵置江陰縣與元和志及通典不同考晉自太

康二年置暨陽縣之後而晉宋齊三志並有暨陽縣自梁敬帝置江陰郡縣之後而隋志弟有江陰而無暨陽是梁於暨陽置江陰郡因改暨陽爲江陰耳隋志元和志及通典唐地理志初無割蘭陵縣立江陰縣之文而寰宇記及輿地廣記乃追書割蘭陵爲江陰縣自祥符圖經始有此說蓋蘭陵與江陰爲鄰或

一時割蘭陵以益江陰之地亦未可知但不可謂專

割蘭陵爲江陰也至云江陰本漢曲阿之地亦因謂爲蘭陵所分而致誤耳

又按陳志據沈文阿傳云

侯景平文阿監江陰郡以爲景平在承聖元年置郡

當在其前不知文阿傳系累言之

不必監江陰郡定在平景之年也割蘭陵之利城并

以舊城置梁豐以屬之

陳志梁改晉陽爲江陰就縣置郡而徙縣治於君山之陽

割蘭陵郡之利城并置梁豐縣於暨陽之墟以屬之

按寰宇記故利城在懷仁縣西六十里東晉與僑郡俱立輿地紀勝引輿地志云晉元帝以海虞北境之土山立利城縣宋元嘉八年遷于武進之利浦方輿紀要梁未置屬江陰郡此蓋至是始屬郡耳非至是始置縣也置字誤

梁豐方輿紀要梁未置屬江

陰郡陳永定元年奉梁敬帝爲江陰王

趙志云以其地濱大江故名江

陰以縣爲江陰國

南史陳永定元年以江陰郡奉梁主爲江陰王行梁正朔

至德

元年徙治夏浦

寰宇記艦浦池在縣西十八里古老云陳至德元年江陰郡守倪啟徙江

陰縣治夏浦

隋平陳國除開皇九年廢郡及梁豐利

卽其城也

城二縣入江陰仍屬毘陵郡復徙治君山之陽

隋地理志

江陰梁置及置江陰郡開皇初廢郡并梁豐利城入焉

趙志云其治仍居君山之陽

唐武德

三年置暨州復置暨陽利城二縣

按晉置利城于海虞北境宋遷于武

進之利浦梁改屬江陰隋卽併入縣境唐武德三年復置九年仍省寰宇記武德三年併入江陰縣亦誤

九年州廢省二縣來入隸常州

唐志云武德三年以江陰縣置暨州并析

置暨陽利城二縣九年州廢省武宗會昌四年升縣

暨陽

利城以江陰縣來屬常州

武宗會昌四年升縣

爲望

咸淳毘陵志云常州五縣至是四縣升爲望

按唐地理志書爲緊九域志書爲望閔初升年

月南唐昇元中始建爲江陰軍

晏公類要寰宇記均

職方攷不載

按咸淳毘陵志云續通典江陰縣後

唐昇元中升爲軍馬令南唐書建國譜書以江陰縣

別置軍闕年二書皆曰南

唐惟五朝史志云僞吳

宋淳化元年廢軍爲縣三

年復置軍

蔡志云從縣人司諫熙甯四年再廢建炎

張歎之請復爲軍

熙甯四年再廢建炎

二年復爲軍

蔡志云從父老胡崇等請復縣爲軍

按建炎以來繫年要錄云虜犯泰州岳
飛以泰不可守率眾屯江陰軍

沙上建炎四年已復江陰軍矣紹興二十七年復廢

三十一年又復

繫年錄云紹興二十七年二月廢江陰軍爲縣隸常州以浙西安撫榮薿

言自建縣爲軍於朝廷初無所補故有是命仍屯兵三百八十人以知縣兼軍使紹興三十一年十一月新知嚴州楊師中知江陰軍墳復置閼江陰比廢爲縣至是復之仍賜師中銀二萬兩爲軍費德祐

元年元取之以爲本軍行安撫司事

據陳志按蔡志云元人改爲

南興元至元十三年升爲江陰路總管府

張著至元重修公署

記至元十三年江南初附州軍例升爲總管府領錄事司治江陰縣

二十八年降路爲

州隸常管尋以州爲上州隸江浙行中書省

陸文圭江陰改

州記至元二十八年秋七月二十三日江淮行中書省參知政事臣公楠奏暨陽與昆陵郡壤相接戶不

滿七萬設立總府非是請改州隸毘陵管內省併司
縣各一減官吏俸數十於事理便制曰可是歲十二
月擢烏魯克錫布哈爲州長官刻印之任始至問民
疾苦皆曰江鄉土狹民瘠介在一隅以故無大徵役
今以屬州事統府其情不吾察奈何侯曰第安之吾
在母恐既而符檄數下調發無虛日沂流供給回遠
百里民疲於奔命訊報淹留囚多瘐死兵廩不時率
有怨言侯慨然曰吾受命作牧民瘼卽吾瘼也時廉
訪使者適至侯且言其不便率州之士庶請以州隸
行省事得直達免旁郡牽制之虞未報會至尊新登
寶位勤卹民隱宰執條具以聞上可其奏令下之日
士庶呼舞恩若更生侯亦喜曰今而後得專治吾民
矣治之期年政平訟簡州以無事朝廷嘉之秩滿遷
常州路同知總管府事先是公嘗爲此郡治中常民
喜公之復來而暨民惜其驟去也於是述置州顛末
謹刻諸石俾來者有攷且以寄去思之情云元貞二

年六月明太祖於甲辰年改連洋州尋復爲江陰州

壬子

明太祖紀至正十七年六月趙繼祖克江陰

明地

理志太祖甲辰年曰連洋州尋復曰江陰州按甲

辰年元順帝

明地理志吳元年

二十四年也吳元年四月降爲縣明地理志吳元年

四月降爲縣按

吳元年至正二十七年也以揚州泰興縣之馬馱沙

蔡志以爲洪武元年誤

以揚州泰興縣之馬馱沙

來屬仍隸常州府

陳志縣北揚子江心孤山卓立波濤中四面潮泥日以附益浸成平

壤東西七十里南北二十里宋元半隸泰興半隸江陰明初乃全以來屬成化十七年析

馬馱沙置靖江縣

國朝爲縣如故仍屬常州府

年代	封表						
統部	國州郡軍	縣					
禹貢	揚州	揚州					
殷	揚州	揚州					
春秋	揚州	吳	句吳				
戰國	楚						
秦	會稽郡						
漢	會稽郡	延陵季子采邑	吳泰伯封域				
	昆陵縣暨陽鄉	春申君采邑					
	延陵鄉						

元和郡縣志作
漵陽

新莽

東漢

吳

晉武帝揚州

太康二

會稽郡

吳郡

晉志順帝分會稽立

典農校尉

毘陵郡

晉志分吳郡建

暨陽縣

毘陵縣暨陽鄉

東晉成揚州

年

晉陵郡

晉志惠帝永興

暨陽縣

析縣境置南沙

帝咸康

七年

宋文帝南徐州

元嘉八年

齊
梁敬帝南徐州

太平二年
江陰郡

利城縣

齊

南徐州

晉陵郡

江陰縣

晉陵郡

暨陽縣

元年封東海王
越世子琨避琨
名改

煬帝大 年	開皇九 隋高祖	年	永定元 陳武帝	年 南徐州
毘陵郡	常州 初治常熟後改 常熟屬蘇州移 常州於晉陵	隋志平陳 郡廢常州	江陰國	
江陰縣		江陰縣	利城縣	梁豐縣

業三年

唐高祖

武德三

年

九年

觀元年

太宗貞

江南道

暨州新置

江陰縣

暨陽縣新置

利城縣復置

常州廢暨州以

江陰縣廢暨陽

入

江陰縣

乾元元年	肅宗至德二年	天寶元年	元三十一年	元宗開江南東道
浙江西道節常州	江東防禦使常州	江南東道	常州	
江陰縣	江陰縣	晉陵郡	江陰縣	江陰縣

憲宗元
和二年使
鎮海軍節度常州

南唐太

祖昇元

中

淳化元

年

宋太宗

江南道

常州

江陰軍

江陰縣

江陰縣

江陰縣
軍廢

二年宋 至元十 二年	元世祖 年	三十一 年	十七年	紹興二 兩浙西路	炎四年
				常州	
軍未幾復故 行安撫司事	江陰軍 <small>入元初改南興</small>	江陰軍 <small>復置</small>	江陰縣	江陰縣 <small>廢</small>	
	江陰縣				

祐元年

十四年

二十八

江浙行中書

常州路

廢江陰路來隸

江陰州

上降路爲州

江陰路總管府

升

江陰縣

年

明太祖

江南行中書常州府

連洋州

未幾復故名

甲辰年省

年

元至正二十四

吳元年	江南行中書省	常州府	江陰縣 <small>仍改州爲縣以</small>	馬馱沙隸之
至正二十七年	洪武元年	直隸中書省常州府		
治元年	憲宗成化十七年	南京		
國朝順治元年	江南布政使司常州府	常州府	江陰縣	
	江陰縣	江陰縣 <small>析馬馱沙置靖江縣</small>		
	繁疲難			

明王百穀名穉登有集廿一種第一爲晉陵集因先
爲江陰金鳳里人補常郡博士弟子員後徙居吳門
遂以少作爲晉陵集按金鳳里卽吾邑東南鄉馬鎮
璜塘二鎮地今縣志有利城訪王百穀故居詩未知
孰是

天香閣隨筆二卷集一卷刻於伍氏粵雅堂叢書中
其跋云明李介撰介字介立江陰人事蹟僅見卷首
附錄自撰崑崙山樵傳俟考原鈔本譚玉生廣文偶

得於羊城書肆卷首有同邑徐恪題識亦不知何許人云云余按江陰縣志隱逸傳李寄字介立卽徐介立母周氏徐宏祖妾方孕而嫡嫁之以育於李氏故名李寄又以介兩姓厯兩朝故自命介立奉母居定山終身不娶母卒隱由里山號由里山人霞客遊記經燹失去介立訪輯之此介立平生事蹟也伍氏所刊集凡詩二十六首皆次韻之作又古文五首余按江上詩鈔謂介立有藝圃存稿六卷詩二十四卷所

鈔則爲停車集髡春集谷口集附遊集偕隱集晴川
集鳴蟬集聽雨集孤筇集息影集每集皆有自序共
詩一百四十二首而伍氏所刊次韻之作不與焉其
全集不知尙存否徐恪字昔民亦江陰人沈歸愚別
裁選其詩

嘉興沈濤匏廬詩話云江陰孔堯山布衣號千秋通
六書工篆刻嘗游錫山見漢人孔千秋銅印喜與己
名相合囊無一錢典卧具購得之其癖嗜如此有夢

餘小草若干首佳句云春蠶絲已盡苦殺不成綿甚
得齊梁古意嘗著說文疑疑一書謂說文自漢以來
傳寫詰屈亥豕混淆又當塗李氏鼎臣兄弟各附新
說熒惑後世故以鐘鼎古文及歷來字學之書參考
得失臆說頗多而大旨尙不謬於許云云余按千秋
名廣居所著說文疑疑分上下冊一卷刊於嘉慶壬
戌余鄉自兵燹後已無傳本近於徐氏獲見陳蘭甫
京卿手批本題云庚戌年得於淮上攜於舟中閱之

多精確語以貽予遠太守蓋太守亦深於說文之學
者篇首序論凡例其論俗書云夫由秦漢而視魏晉
以下則魏晉以下所增之字固是俗書若由三代而
視秦漢則秦漢時所增之字亦俗書也秦政新莽屢
改古文洎乎季漢舛謬滋甚叔重一人亦何能釐剔
淨盡愚故于是書未敢確然全信也乃世之墨守說
文者凡說文所有无不以爲是說文所无則必以爲
非噫亦過矣

說文鐸殺也徐鍇曰說文无劉字偏旁有之此字又史傳所不見疑此卽劉字也从金从𠔎刀字屈曲傳寫誤作田耳力求切說文疑疑云說文無劉字徐氏謂刀字屈曲誤作田字同文集正字通附會徐氏謂劉本作鎔說文譌作鐸或又謂當从𠔎不當从𠔎愚謂𠔎𠔎本通一韻何必區分顧氏集古印譜中劉姓印四十餘又他處所見古銅印亦不下二三十大都不離𠔎金刀之文从未見作鐸鎔者袁氏宮桂曰鐸

疑卽劉之古文許氏于莊秀等字但書上諱而不敢詳其義其慎也如此劉爲國姓雖无所忌諱然于國姓之下注殺二字于臣子之心有所不安故特于古文著其義而逸弒金刀之篆文也

說文箇厚也从高竹聲冬毒切 竺厚也从二竹聲
冬毒切 篤馬行頓遲从馬竹聲冬毒切 說文疑
疑云箇从高者以孰物獻上也故箇有厚義竺从
二二者地之象也故竺亦有厚義箇竺二字通可也

至于篤从馬訓馬行頓遲並无厚義乃今經傳舍晉
竺而从篤皆後人易篆爲楷之失也

坡公詩黑雲翻墨未遮山白雨跳珠亂入船捲地風
來忽吹散望湖樓下水如天寫夏雨最妙先祖湖
上看雨五古中四句云雨來近山失雨過遠山見俯
仰只片時氣象已百變陳丈蘭甫京卿舟中看雨詩
云熟雲如芙蓉亭亭壓山背黝然死灰色飛電出其
內雷聲漸隱隱雨在十里外長風忽吹來勢迫飛鳥

退岸旁千疊山頃刻失所在風氣如潮湧雨點似石
大我舟艤平沙繫纜了不礙陰晴變萬狀縱目得一
快新涼舒勞筋餘潤灑渴肺今夜伸脚眠清夢入虛
籟亦各有其妙

蘭南京卿見贈詩及錄示者已載初二筆其詞亦絕
工有憶江南館詞稿水龍吟追和程春海師與吳石
華學博登越秀山看月韻云詞仙曾駐峰頭鸞吟縹
渺聞天際成連去後素弦彈折萬重雲水碧月仍圓

蒼山不改舊時烟翠只長林墜葉金風過處都吹作
秋聲起 今夜露臺同坐對清光酒顏全洗珠江滾
滾暗潮消盡十年前事疏雨飛來白雲一角漲嵐甘
里賸出山迴望燈明佛屋有閒僧睡錄此以見一斑
覺白石玉田去人未遠

石華學博陪程春海祭酒登越王山看月詞云邃聲
吹上銀蟾山河影裏秋無際溶溶一色樓臺著處都
成寒水水氣浮烟痕冒樹蕩爲空翠正人聲斷盡

西風料峭聽幾杵疏鐘起 難得乘槎客至愛青山
露華如洗荒臺古甃再休問漢時遺事黃鶴招來碧
雲無恙夢圓千里想潮平海闊珠光隱隱有驪龍睡
祭酒於前歲夢游珠江 所謂不似人間語真絕唱也
至是果以典試來也 學博名蘭修嘉應州人有桐華館詞爲粵中詞家之
冠又有羅敷媚題采桑圖云筠籃恰稱腰支細裙束
湘雲髻挽巫雲小畫春山碧二分 陌頭歸路斜陽
暝誰覺銷魂只管銷魂再不回頭看使君用意深厚

似古樂府

許海秋記注宗衡有玉井山館詞其壺中天詠女兒

酒云流霞一瓊借門闌喜氣較量香色但使呼名郎
已醉恰稱芳筵今夕薌澤微聞嬌憨誰釀箏響留髡
急吳姬休勸泥人小字難說須記碧玉生時綠珠
嫁後滋味嬾心識不是臨邛春可買珍重華年錦瑟
姑食宜諳嫂羹同熟夫婿金貂直銜杯一笑洛陽風
景堪憶周旣叔都轉東鷗詞賀新郎詠女兒酒云一

見心都醉笑偏如錢唐蘇小鄉親原是剛趁釀花天
氣好釀出春愁滋味稱貯向銷金帳裏記得蘭陵曾
有箇與盧家少婦同名字荷鉢者爲卿死女兒亭

外沽春地正江村美人璽碧夫人李紫有客金貂初
聘得領略溫柔如此看捧出纖纖玉指壓倒梨花三
百輩祇當驢嬌面差相似酣卧也海棠底二詞同一

風韻

與王井詞齊名而先東鷗典鹹粵東者爲何丈青耜

都轉兆瀛有心庵詞四卷曾以見贈有蝶戀花晚香
玉云一院晚風花馥郁簾外斜陽簾內人新浴簪上
搔頭鴉鬢綠恰如粉蝶雙飛宿 梳子素馨同鏤玉
比似瓊花略有些兒俗墮向枕函香一夕郎心熏透
眠方熟亦風韻絕佳

心盦詞春從天外來立春日作云試把金尊問故國
梅花可有春痕好春如海隨著江雲等閒渡了春魂
甚天涯芳草卻繫住幾處王孫望江南有烟霞樓閣

楊柳籜門長安廿年小住臘夢裏青山未染紅塵

歌舞清狂文章利市眾中容我吟身耐情天難老纏綿煞絮果蘭因儘春人辦軒眉一笑花草精神金縷曲燕云辛苦銜泥燕儘迴翔朝朝暮暮雨絲風片覓得新巢棲息穩爲爾珠簾常捲卻換了一般庭院故主恩情還記否記幾番王謝堂前見曾舞得紅襟倦炎涼世事尋常變見說道寂寥羅雀翟公門掩曲曲雕梁泥落盡紅臘斜陽一線聽枝上流鶯低轉似

訴東鄰留滯爾舊同羣軟語含淒怨秋近矣莫飛遠
臺城路過廢寺云修蛇曲折城南路倚筇還過蕭寺
掃葉門深種花僧去冷意野鷗知未葦花滿地有頭
白人來相看蕉萃瑟縮寒鴉似曾相識一枝寄 祇
林無限往事一般興廢感都付深喟詩夢烟空酒人
星散眼底惟餘秋氣流連荒砌認疥壁蝸涎模糊文
字鈴語催歸夕陽天半墜

吾鄉張氏宛鄰詞選風行一時陳蘭甫京卿嘗謂余

宛鄰所解大率穿鑿惟姜白石疎影詞謂以二帝之
憤發之故有昭君之句最爲得解

周旼叔都轉嘗與人書云每笑窮措大數十年奔走
名場饑寒如故坐視井庖蕭索妻子啼號仰屋哀吟
束手無策出見市井駟儈鮮衣美食詫爲天人而乃
匡坐大言如有用我必能經綸當世衽席斯民其誰
信之吾輩多有此習最足令人捧腹云云余按此說
正與朱默存詩所云吾謀不足用亦爲斯民憂生計

尚不足大言徒悠悠同一慨歎

蘭甫京卿嘗製晉笛子遠太守有與考論燕樂書後附及之云晉十二笛乖僻離奇久經廢棄閣下乃從故紙中理而出之此誠不敢附和苟勸論笛以勻開六孔爲無法而創爲上度下度之法別製十二笛推移其孔密者二孔相並一指不能按二指又不能容其疏者則相去太遠而指不能及正使音律和諧尙猶不適於用況無一音相叶者乎此真強作解事可

笑之甚故當時不能行用旋作而旋廢凌次仲譏其
妄以笛孔取則琴徽是也而閣下顧特好之如式製
造以爲晉笛復出於人間亦好奇之過也夫簫笛勻
開六孔而聲調自合此天地生成之妙非人力之所
能爲也今以其爲俗伶所用而鄙棄之別製不勻之
孔以爲必如是然後爲有法之古樂器也法則法矣
其如指不能按聲不能諧何願閣下之亟毀之也

古樂惟唐宋燕樂猶存梗概近儒凌氏次仲燕樂考

原六卷於聲調分合尙未詳明徐子遠太守有樂律考二卷抉剔隱微其於仲呂復生黃鐘之法以餘分之中數求而得之尤能發先儒所未發云

杭僧守詮詩云落日寒蟬鳴獨歸林下寺柴扉夜未掩片月隨行屨惟聞犬吠聲又入青蘿去東坡曾和之又湖僧順怡詩云久從林下遊頗識林下趣從渠綠陰繁不礙清風度間來石上眠落葉不知數山鳥忽飛來啼破幽寂處王荊公最愛之

開縣陳友松大令

崑

有雙檜書屋詩草有句云驚沙

枯日色落木瘦風聲與沈方舟沙乾奔渴馬風緊下

飢鷹之句同一警鍊

方元鵠著小樂府有鐵錚錚一篇詠鐵尙書鉉云膝
如鐵立不屈口如鐵罵不絕頸如鐵拗不折斷我膝
百鍊骨抉我口三寸舌斫我頸一腔血鐵錚錚嗚呼

鐵

汪芙蓉近刊隨山館詩稿刪去舊作香斂雜詠六首

余見其典雅而不流襲狎爲錄存之詠莊云好檢風
詩詠碩人豐容盛服自停勻禮成柘館三繅日相好
蓮臺九品身不事矜持花解語自然溫麗玉生春由
來心薄驚鴻態未要陳思賦洛神詠嬾云半啟窗前
玉鏡臺梳頭偏待小鬟催熏籠夜久還重倚綫帖春
深夫盡開宋院畫宜摹倦繡漢宮妝本號慵來東風
昨夜渾無賴應是新含荳蔻胎詠憨云遊仙夢好待
重尋拈得花枝不肯簪窺客畫簾藏半面背人小祫

繡雙心相逢下九春猶淺罷戲秋千笑不禁記得將

離還並坐似無情處最情深詠癡云默默相看意未

傳殢人深處泥人憐慣依抱日嬌郎側李義山詩嬌郎
癡若雲抱日西私誓慈雲古佛前一半性情分慧黠十分心事

共纏綿愁深夢淺知何事祇是花時更惘然詠愁云

春留影事夢留痕黯黯能銷一段魂更不分明疑白
醉最難排遣是黃昏百年風月來無迹萬刦人天種

有根爭信石頭城畔住箇儂名字自溫存詠病云瑤

情玉思總懨懨待把脂奩換藥奩山寫眉痕還似舊
風多花氣轉微嫌儘拋春色三分去斗覺宵寒一倍
添猶自防他同伴笑曉來妝束更矜嚴

壬子秋有到廣州與婦書云吾自渡揭嶺日遠故園
下灘乘瀧並值冬涸川石露列溪流清弱瀧船柔脆
篙師猶拙自平石至樂昌乃昔遷客啼泣驚怖之地
凡有六瀧酈道元所謂崖壁千空交柯晦景者也瀧
源出湊入洭漢桂陽太守周昕疏鑿巨石始通舟楫

舊有祠祀昕今爲祠禱韓愈素湍激雪風濤凜厲估
舟驚望歎若天塹然觀其水勢淺陥殊甚徒極崩奔
之狀實無浩洵之奇吾舟下瀧時觸破來舫移岸遷
貨纖毫得濟非有江湖嵇天之浸風濤呼吸之危也
而眾人矜惜衣裝懼於濡沒重載輕發自取破碎清
水白石遂受惡名耳口相傳自爲眩惑致使衣帶之
水與呂梁齊險禱求謫臣而使君廢祀以愈生時猶
不自濟欲其爲福不亦難乎由樂昌下大舟東至曲

江五嶺之口也縣以曲紅岡而名江紅聲同因改字
矣設府建關控引吳楚浮橋橫江以權舟稅大艤巨
艦駢闐於此韶石在其北酈生所記二仙分憩之處
也自唐以前傳虞舜奏樂於此及英德亦有堯山道
元引耆舊之言云堯行宮王韶之記亦謂堯故亭又
曰父老相傳南巡登此然則禹迹以前斯爲內地且
金銀輪王治四天下唐虞二聖豈局步於五嶺乎以
英德至今清遠經歷三峽卽湏陽大廟中宿也大廟

介二岐之間趙佗築萬人城楊僕伐破尋匯亦此岸
地然是陸路之要區也江行之奇則在湏陽道元云
兩崖傑秀壁立虧天張子壽亦言晴晝山陰先秋水
冷後人始開棧道建峽山寺於上縣崖長獻江帆肅
瑟雖詞客尋玩淹留忘俗而旁山剝落翠秀靡依以
吾卧觀未爲佳勝也且南州炎德草木恆青藻雨山
川宜增幽曠而石壁竦仄勢若火燎丹皮赭骨寸莖
不附孰如蒸湘巖樹葱蘢松竹櫛柏陵冬鮮碧故過

嶺以南無可瞻悅但此峽擅名旣久未躋絕壁江山
嘉會步步異形若登臨俯觀或當有異故周夔云碧
瀾之下寸寸秋色乳枝磬落松風瑟縮得此石室題
爲到難矣吳都賦以閩禹楫師習御長風今老龍河
西等船實爲惄陋舟形彭亨水手麤疏每下篙竹喧
呼叫跳足若蹠蹠號聲慘冽清旦黃昏聞者駭悸兼
刦盜肆出人人自危下至三江乃稍稍清曠三水今
縣漢地志所謂洭水南至四會之地也洭水自清遠

來曰漿江牂牁水源流萬里自肇慶來曰西江晉康
水自廣甯來曰綏江均會崑都故爲縣號綏江至縣
復分二派同爲一川故昔言四會矣冬水涸盡舟楫
無利始以季冬六日至於廣州此州實四宅之南交
荊州之下徼自漢迄今絲富有名往在他方聞彼土
人說其物產矜炫殊絕云甲天下及躬覽風物攷之
圖志要其土俗可得言焉州爲秦南海郡地山海經
所謂賁禺郭景純云今番禺也姚文式言城東南偏

有水枕陵此縣人名之爲番城倚其上在番山之隅也城始築自越人公孫隅號曰南武楚威王時有五羊銜穀穗之瑞乃增築楚庭周十里號五羊城及任囂趙佗始成都會吳步隴又廓番山之北及宋築子城甃城又增兩翅以衛居民明永嘉侯朱亮祖始連三城爲一卽今省城制也市廛逼笮第宅堅陝街衢垢穢無潔清之容民言侏儒貪利好奢自外中國別爲風氣地性蒸煖易生疾疫蚊蠅乘其昏運蛇鼠充

其毒食瘴膚風淫尤多盲女昔人言之詳矣島夷雜
糅詭服殊形刀劍火槍縱橫於路民無正業習爲博
盜白晝攫金露刃連隊不知其非法也俗取周興嗣
千文列字八十分爲一章四分取一任人射覆凡出
三錢之資償以十金國人若狂夢想顛倒號曰白鴿
票斂財之巧術也意錢擲骰割肉懸壺藏鉤攢牌皆
供賭輸愚者傾家智者疲神古博徒所未聞也凡倡
女冶容多樂隱蔽獨此邦中視同商賈或連房比屋

如諸生齋舍之制或聯舟並舫倣水師行營之法卷
髮高尾白足著屐燕脂塗頰上連雙眉當門坐笑任
客擇視家以千計人以萬數弦唱撮聲盡發鳩音遠
遊之人竊窺之性入於其間若抱虎狼斯實男女之
一卮乎異物怪產來自番舶土人所甘良亦奇詭菜
必生辛羹必稠甜若夫檳榔酸澀蕉子甘爛諸重十
斤芥高七尺君遷小柿新會大橙不含霜雪多復皺
腐醃橄欖以鹽豉取蟻糞爲奇南榕樹不可攀木棉

不可槩奇器巧制則故賤其值水火菽粟則盡昂其
價陸生所記南越之竟五穀無味百花不香者信非
他方之所取也冬至初過桃榮棟落餘花生紅多不
辨名但見其質了無其姿亦何取於長春乎邦人市
海鮮別爲廚館則有沙魚之翅海蛇之皮章舉馬甲
鯷鯉天蠔鹹蟹龍蝦雄鴨臘鷄腥穢於市井紛錯於
樓館者不可勝計又俗好燒炙物喜生割操刃持叉
千百其徒乞人待肉食而滌賓筵以多殺爲豪婚禮

燒猪輒列數百俗無羞恥取婦以得女爲奇牀第之
私守宮之驗明告六親誇以爲榮知禮之家亦復隨
俗亦旣觀止我心則降此尤可笑歎者也通商之夷
何止百種蟠據城府傲兀大官屈心事之惟恐不歡
況敢設備豫乎外郡土客讎殺未已且不受官勸誰
能用武鄉村族居多建礮臺縣官催科動必發兵幸
而戰勝懼而納稅省中錄囚日屠百人皆無辜之窮
老受錢而代死子賣其父如犬羊然輕命者貨三綱

絕矣朝富則爲大豪夕貧則充盜魁昔南漢劉鋹奢
僭自雄樂裸逐之戲制燒煮之形今久漸皇風猶爲
惡俗若非猛厲廉正貴士賤商先教禮讓後禁姪盜
則伊川之野不百年而爲戎乎尉佗文理以止門陳
祖奮武而勸王彼何人哉彼何人哉吾鄉遊宦士大
夫多懷遠思亦有彊壯無瘡而夭柳生夏凋翁君冬
亡雖會冥數誠可悲懼也容兄以卑官居韶十口飢
寒其妻與妾居比肩鈞敵呼嫡子爲兒視所生如奴

山農新取南女以爲繼妻此女矜其華年輕鄙老夫
動卽叫罵坐必偃蹇同至南海便褰裳而去獨坐夷
船還其母家雖昔馮敬通之悍妻賈公闐之妬婦以
今方古未足云奇亦近事之新聞女史之一鑒也夫
陰敎不修夫妻同過但責女德豈足爲平想卿聞此
達斯誼也吾好爲遠遊何必樂土優遊自如身心無
患比讀莊生之文悟其元旨知物論生於是生死
累於形骸頗欲逍遙以化成虧何覺哀樂之殊境離

合之異軌乎性恐淑子獨處幽憂聊書所經以爲笑
噱冬寒日輕春物方妍起坐眠食勉當自慎時復手
書以慰勞勤

莆田郭蘭石太史尙先官編修十二年不遷人呼爲
金不換以編修七品戴金頂故也天門蔣笙陔修撰
立鏞在館十年不遷人呼爲石敢當以修撰六品戴
車磲頂俗稱白石頂也金不換石敢當可稱巧對

居易錄二十一卷云四川提督總兵官吳英說昔得

祕方治撲打跌損傷極効雖重傷瀕死但一絲未絕灌下立甦其方以十一月採野菊花連枝葉陰乾用時每野菊花一兩加童便無灰好酒各一碗同煎熱服又一方未退胎毛小雞一隻和骨生擣如泥作餅入五加皮傅傷處接骨如神

又云前甯都令李聘云麥粉不拘多少用陳醋熬膏貼無名腫毒効

袁翔甫大令談瀛錄云由上海至香港一千一百三

十九里爲中土內洋由香港至西貢三千四百七十
七里爲外洋乃出界第一碼頭

英公司不泊西貢以
新加坡爲第一碼頭

檳榔嶼爲第二碼頭再向西北行至新加坡二千四百二十一

里乃第二碼頭再向北行五千七百里入印度洋至

錫蘭乃第三碼頭再向西北行八千一百十三里至

亞丁爲第四碼頭再向北行四千七百里入紅海至

蘇彝士河爲第五碼頭舍海入河計三百四里出口

至鉢碎爲第六碼頭再向西行入地中海三千八百

八十二里至義大利國拿波利城爲第七碼頭向東南行一千七百二里至法國馬寨海口從此舍舟登陸火輪車道徧及歐洲各國惟至南北阿墨利加洲及阿非利加洲乃須涉大西洋耳

錢琴齋歐游隨筆云地球自西向東而旋晝夜一週日月之力吸起海水故在江浙兩省海岸潮汐猛干他處日遠而吸力小月近而吸力大故朔望上下弦潮汐有大小之異秋令月色加明月力更大是以秋

潮必盛于他時也

又云地氣能吸空氣能壓故凡物之自上而下者爲順吸之壓之故也水龍以皮管吸水雖高尋丈可使源源而來者以後管之中已吸去其空氣而河中之水爲空氣所壓自然流入後管于是後管所得之水自然推入前管壓之使出皆氣爲之也人常以玻璃杯倒置平放水中水不能過杯口以上以其氣實于杯中也必使杯畧側氣得以出則水自浸灌矣故講

化學者必先明其氣

高引之觀察從望同治九年隨使法國有隨輶筆記六卷觀察抵法後先由美國歷太平洋經日本而回計自牛腰耳行美國內地輪車陸路一萬一千二百餘里到三法郎司司高卽金山地方八月十六日附輪船開行入太平洋至九月十一日抵日本之橫濱計二十五日行水程一萬六千六百餘里在汪洋巨浸中絕無島嶼浪長而緩不甚顛簸故名太平其二

十三日記云天氣晴明甚暖漸近南故也此次船行南路蓋此海有兩路一南一北南路遠二三千里冬令北路因近北冰海每多狂波惡浪向例船開行時公司主人有信一封付船主卽係定走何路之命俟船行至口外始準開函故於船始開時卽船主亦不知行何路緣途長客眾若早宣示恐人言雜而心不定也數日來船每行二百一十餘邁或二百二十餘邁不等每邁計中國三里三分許總在七百里上下九月初一日

記云按昨日係西洋歷十月十三日今日應是十四日明日禮拜因向西行十數日每日餘二十餘分明晦由是稍差計時而算則今日已是十五日故船上耶穌教人卽誦經拜佛蓋地右旋人向右行及至上海已失去一日矣則今日謂之初二日亦可二十三日記云早進吳淞口詢之上海人是日卽二十四日矣九月初一日所記果不誣云

隨輶筆記余第見抄本尙未刊行也

栗香三筆卷二

江陰 金武祥 淹生

粵東西江水患昔人議於河頭至黃泥灣開鑿陸路四十五里使由陽江入海以殺水勢光緒五年委員履勘需銀二千萬兩有奇牘稿曾載二筆余于役高涼溯新興江抵河頭登陸至黃泥灣泛漠陽江身厯其境以爲卽能籌巨款開通所以殺西江水勢者亦恐無大效蓋新興江口至河頭幾及二百里由黃泥

灣至海又約二百里萬山層疊盤曲紆迴西江自西而東出羚羊峽卽一瀉瀚漫入海匪遙今欲其折而西南行是舍近而行遠舍直而行曲舍寬而行狹也豈得謂順水之性以利導之耶

陽春江卽漠陽江舟自黃泥灣乘流過陽春縣下至馬水一路重巒複嶂平疇中削出奇石峻峭玲瓏屈翁山紀陽春巖洞最詳余詩有云奇與陽朔爭秀或羅浮匹洵炎陬之勝境也

昔楊騷求爲陽朔令王侍郎笑之 本朝阮文達有
願舍節鉞而爲陽朔令之語余過陽春愛其爲山水
勝區且聞爲牧令優缺而縣志載宋春州推官王孝
叔勅云南方荒遠之州吏多憚往而爾請行焉故優
爾祿賜而以勸賞隨其後往其勉矣思父兆民云云
蓋昔時嶺外蠻荒爲猺獞之窟瘴癘之鄉故願至者
少也

自廣州赴高州有由恩平行者可近兩日程路多沿

海極荒僻余至電白桂海霞明經取道恩平先至見示詩云瘠土皆燒墾羣山互莽蒼絕無墟里在翻厭旅途長壁壘壘屯荒戍旌旗捲夕陽征人日來往幸免客探囊海霞名文熾南海人

高州多虎患余道經八甲諸處日入後卽戒夜行土人云近海處虎爲鯊魚所化余按赤雅云海蠻師魚身虎頭無鱗甲短脚利爪渾身豹文長八九尺見人注數行下蠶人輒網得之此蓋化虎而未成者也

余以高州沿海多虎因得句云島嶼風腥魚變虎久
難其對後登電白望海樓適虹見忽爲雲掩土人云
此蜃氣也因對云樓臺雲幻蜃連虹蓋觸景成句非
身歷者不知

余漠陽江中有句云巖暖猿搜花釀酒林深狸攫果
爲糧畊叔都轉評云此種奇景惟嶺外有之不意盡
被淮生搜入錦囊何不廉之甚耶

由三水縣至廣州多經佛山亦有由金山石門行者

繞北而行風景殊勝金山卽靈洲山謂之鼈峯東坡題寶陀寺詩卽此地石門爲漢樓船將軍伐南越挫粵鋒於此兩山對峙屹若門闕舊稱石門返照爲羊城八景之一余於孟夏望後五鼓自金山放棹至石門得句云殘月漸低風露冷櫓聲搖過石門來蓋山色江光侵曉尤有清氣較勝於落霞暮靄時耳

同治元年李黼堂方伯桓任江西藩司時有採訪江省殉難紳民詩文札云照得中流保障賴砥柱於綱

常大塊文章助波瀾於忠孝惟至性秉其儀之一斯
立言居不朽之三當夫攬轡澄清登陴慷慨或投袂
而誓師草檄或結纓而絕命成詞甚至吉光片羽之
留無非毅魄貞魂所寄是宜亟藉六丁之護尤必先
蒼一酉之藏者也江右山水鍾靈人文淵藪禮法鍾
乎孺子詩派衍於涪翁松菊盤桓彭澤歸田之賦風
雲慘淡文山正氣之歌緬想高風猶傳遺韻爰自粵
氣燄熾章水波翻六千勾越之師五百田橫之客下

逮藜亭弱質晉井餘生瓜蔓株連芝焚蕙歎莫不棲
棲挺節嶽嶽懷奇抗志在三凜遺規於白鹿盟心不
二消浩刦於紅羊然而玉樹長埋金剛不壞斜陽卧
碣堪偕鐵柱以摩挲落月哀弦遙應石鐘之闔鞳止
水風流未歇疊山詩句爭傳潑墨猶新汙青可照鐫
之玉板論已定於千秋鑄作金身人可師乎百世所
遺著述洵足珍焉合亟網羅良有以也夫珠玉之氣
韞櫝而其光愈騰椒蘭之馨委灰而其香彌烈鋪芬

導懿陸機歎逝感懷曠復殘膏束哲補亡創例本公司
昔來承乏時值多艱橫槊賦詩幸追陪于諸將彈琴
解厄資策力於羣公屬以累卵城完咷鯨浪息荷

宸章之簡畀領更事於藩條竊懼文獻無徵差幸典
型未遠愴銷魂於舊雨彥升之遺製猶存掇燒刲於
殘灰明遠之單詞復出李仙杜史尙沿唐代遺聲島
瘦郊寒猶識廬山真面嗚呼丹心未泯忠魂已返於
太虛碧血難藏餘韻猶聞夫流水爰蒐往事用續舊

聞萃百家言備一省志才慙王勃筆花隨霞鷺齊飛
識有張華劍氣共斗牛遙矚凡例四則條列左方
文信國公有驛中別友人和東坡韻念奴嬌云水天
空闊恨東風不借世間英物蜀鳥吳花殘照裏忍覩
荒城頽壁銅雀春情金人秋淚此恨憑誰雪堂堂劍
氣斗牛空認奇傑 那信江海餘生南行萬里送扁
舟濟發正爲鷗盟留醉眼細看濤生雲滅睨柱吞嬴
回旗走懿千古衝冠髮伴人無奈秦淮應是孤月

元遺山有欽叔欽用避兵大華絕頂有書見招和東
坡韻念奴嬌云雲間太華笑蒼然塵世真成何物玉
井蓮開花十丈獨立蒼龍絕壁九點齊州一杯滄海
半落天山雪中原逐鹿定知誰是雄傑 我夢黃鵠
移書洪崖招隱逸興尊中發箭苦天門飛不到落日
旌旗明滅華屋生存山邱零落幾換青青髮人間休
問浩歌且醉明月

河南衛輝府獲嘉縣之亢村驛有巨碑刻明夏貴溪

言黃河曲用東坡念奴嬌詞韻云九曲黃河畢竟是
天上人間何物西出崑崙東到海直走更無堅壁噴
薄三門奔騰積石浪捲巴山雪長江萬里乾坤兩派
雄傑 親隨大駕南巡龍舟鳳舸白日中流發夾岸
旌旗圍鐵騎照水甲光明滅俯視中原遙瞻岱嶽一
線青如髮壯觀盛事嘉靖己亥三月後書隨駕南巡
紀事進呈御覽詞頗雄傑而不叶律且內有明滅二
字豈當年進呈之文均無所忌諱耶

吾鄉顧梁汾先生貞觀有彈指詞三卷光緒戊寅其
八世從孫綬珊重刊之卷末有集黃鶴樓用東坡念
奴嬌詞韻云倚樓清嘯休重問烟閣雲臺何物總似
磯頭黃鶴影瞥眼橫過石壁百戰孫曹一篇崔李數
點鴻泥雪祇應沈醉傲他千古人傑 誰道蘭蕙多
情一般芳草渡萋萋爭發別有憑欄無限意不受潮
痕磨滅萬里空明年時曾照取鏡中顏髮等閒孤負
第三層上風月自註云昔年與容若醉登桑榆墅三

層小樓故落句及之

固始李武愍公孟羣字鶴人弱冠成進士文酒跌宕
有文文山風及其由守令擢監司督軍殺賊將畧尤
長有詩云血氣兵戈外功名戰伐年易迴魯陽日難
放杞人天白酒杯中影清歌馬上弦男兒未三十努
力勒燕然可以想其概也咸豐九年殉難廬州人咸
惜之

同治壬戌勝克齋宮保就逮赴京道經山西橋頭驛

題壁云豪華豔說五陵遊燕領何人更虎頭百戰雄
心馳露布一時將畧寄風流敢拚直諫扶中葉愧播
虛名動九州四十鬚眉猶未老休嗟李廣不封侯

甯武周將軍遇吉祠堂聯云一門全大節百戰守孤
城可謂簡括未詳作者姓名揚州史閣部墓祠聯云
佩鄂國至言不愛錢不惜死與文山比烈曰取義曰
成仁爲桂林陳榕門相國題

陶雲汀宮保督兩江以十月生值六旬壽某撰聯云

八州都督五柳先生經濟文章歷代心傳家學遠六
秩初周一陽來復富貴壽考百年身受國恩長穆鶴
舫相國與

宣廟同庚除夕生日有贈壽聯者云一德贊襄帝庇
元臣同壽考四時調燮天生上相在春前

江都張丹叔觀察守惠州時題西湖水亭聯云放眼
觀古今倘容判事於斯吾願學東坡先生留一段冷
泉佳話寄懷在山水偶爾披襟過此可權借西湖名

勝作片時風月清談又白鶴峰爲東坡故居後人建
祠大城劉樹君觀察守惠州時偕幕客詣祠賦詩祝
東坡生日且集蘇句爲楹聯云白鶴歸何時且作祠
堂伴脩竹先生喜而笑故應主客盡詩人

有某少尉題聽事聯云作無品官行有品事讀百家
書成一家言可謂衙官中之屈宋矣

大興劉寬夫侍御位坦有壻三人皆以年字命名時
人撰出聯云劉位坦三位令坦喬松年吳福年黃彭

年劉家女待年而字或對云潘世恩屢世承恩癸丑
科乙丑科辛丑科潘氏子逢丑成名吾鄉季文敏公
由探花兩次大考第三驟蒙擢用都人撰出聯云殿
試第三大考第三又第三三三見九季仙九九轉丹
成至今尚無對語

有廟合祀藥王財神者楹聯云縱使有錢難買命須
知無藥可醫貧頗可諷世

廣州火神廟聯云緬思上古聖神四時改燧試看太

平景象萬戶炊烟亦極典雅

今以干謁求財者曰打秋風卽抽豐也靖江一縣令有常州某客往謁送以扇遂題詩於扇還之詩曰馬
馱沙上新開邑城郭荒蕪半草萊寄語江南諸子弟
秋風切莫過江來

丹徒嚴問樵太史曾因會試報罷出都至山東旅費
已罄時通州徐樹人中丞爲泰安守初未識面嚴投
以聯云千里而來徐孺子可容下榻一寒至此嚴先

生尙未披裘徐亟款留之並厚贐焉

王澤山孝廉贈友聯云白練裳黃紬被紫綺裘草聖詩伯酒仙鄭虔三絕玉條脫金僕姑鐵如意美人英雄名士何偃一雙可稱強對

陽湖董紅豆詩云黃埃五月長安陌苦憶江鄉樂事多最是打窗風雨至下簾滅燭聽新荷孫丹五云可謂陶宏景入官而松風之夢故在余去歲有山行苦熱詩云萬山圍繞窄如甕清風欲招苦無縫下潦上

霧毒氣蒸況有赤日炙背痛崎嶇莫測世途危酷烈
難逃苛政重忽憶江鄉舊草堂小軒臨水送荷香綠
陰如幄蟬聲靜一覺間眠到夕陽周睂叔都轉評云
狀難狀之景良由筆妙俗手能道隻字否又云褪襪
觸熱時讀此使人意消

宋范景文對牀夜語云魏文帝漫漫秋夜長皆押十
陽獨一句云三五正縱橫又阮籍登高臨四野皆押
七歌獨一句云豈復嘆咨嗟不知解者當如何余庚

申避亂旋里卽事云不能遂遠行能不戀鄉里通首
皆押四紙獨一句云風塵面目改何廉昉太守評云
紙賄通押則可若只押十賄一字便是出韻

余雜憶鄉居詩云姹紫嫣紅開遍了幽香纔放木蘭
花周旼叔都轉評云姹紫嫣紅一聯佳句自不可没
然漁洋詩中偶用雨絲風片四字論者病南北曲語
究不宜入詩

古人云做禁體詩如東坡以毳飯召客亦須陪穆甫

忍飢半日豈得獨餌可謂妙喻蓋禁體有二種如歐
蘇詠雪避玉月梨梅等字此以題義爲禁也如陳廷
慶詠鳥避鳥字偏旁若山水草木題則避山水草木
偏旁此以題中字形爲禁也

初筆錄莫子偲咏雪用東坡韻後見祥符周文之太
守沐潤柯亭子詩集亦有用韻一首云靜極不動山
疑龜欲雪未雪寒先知古來好詩能催雪我詩肯後
被雪催非緣哦句屢撲折鼻氣凍脫三兩髭須區茫

茫一片黑忽然心上流春澌垂虹亭子雪中出歲寒
獨立爭安危江山鎔作大塊版北轍南楫鎣成絲文
章不許著隻字妙手直造天所爲虛空破碎本無物
我欲贈民何所持官衙圍鑪一點火與十萬戶溫其
肌赤手搏寒塑獅象莫以游戲輕羣兒人言臘雪勝
春雪老農服澤今其時孤光炯炯冷疑客無心直入
窺我帷百港暗流失奇響亂楓僵立無好姿今冬米
賤盜賊少爲我一變風澆漓蘆簾紙閣夢安穩吠犬

熟睡千家墀好峯顚頂眾僧禿一一付與袈裟披坐

擁快馬三十五

所轄驛馬額設三十五匹浮染約葦無由馳安得

奇寒殺魑魅墳平滄海塞漏卮烏帽衝風露突兀俯

仰百里惟人隨正欲府趨入吳會出門大笑迷所之

此詩用韻兼禁體益覺其難

相傳文之太守有贈女校書富金楹聯云我富才華
卿富豔兼金身價斷金情歎其運俗字而使之雅近
見柯亭子駢體文又有贈富金文一篇中有云客曰

獨不知辭富爲廉却金爲介卿何品之清而濁其名
歟女乃瞿然作曰不談阿堵何嘗定是清流卽詠斯
飢未必居然季女鄙白圭爲暴富人富於幣妾富於
情也薄紫鏐爲辱金人金其屋妾金其心也又有云
孕靈胎於富媼趾多無愆箴敗辭於金人寃讐不語
結聯云我本富於萬言援筆定連城之價卿亦金能
百鍊誓心爲如水之盟

柯亭子詩鈔送錢小山舊令赴戍伊犁云秋色正蒼

涼關河飛急觴一官吳地共萬里塞天長別淚江楓
赤鄉心嶺橘黃眼前何限恨花月也滄桑何必定封
侯纔爲萬里游出關思壯士高唱動涼州風雨哀弦
寫山川健筆收歸時誇險要識路是驛鷗摘句五言
云幽花妍綠月疏磬韻蒼烟古渡鐘聲暝荒城雪意
深冰霜磨銳氣雷雨鬱雄才七言云跌宕湖山猶有
地飛騰身世豈關天少年黃絹文章賤老大青衫涕
淚枯江海雄關原地利華夷互市豈天心皆雄渾精

警卓然可傳

祥符周氏兄弟文章科第豔稱一時文之太守以甲午省元與弟朗山太守同捷丙申進士涑人直刺舉癸卯鄉試畊叔都轉以庚戌進士入詞林季貺太守雖未獲科第而才名與諸昆埜皆觀察芥堂先生岱齡哲嗣也朗山太守悅脩原名源緒有訟菴遺稿僅十數首書感寄呈袁文午橋云浪跡成高尚偏蒙老友矜頻移溫札勸不下檄書徵感激時流涕艱危但

撫膺擒王賊自定按劍看金陵義旂纔號召潁毫盡
投戈豪氣吞南帥孤軍扼大河巡城雙棒在拜表一
冠峩亦念還朝去維持國事多文之兄金壇圍解云
顛地呼天一逐臣支離南北走風塵那堪萬死投荒
骨又作孤城誓命人白鼻騎從關外返紅毛刀向陣
前掄書生未有封侯願爲報君恩不惜身舟泊洪
湖書憤五首之一云骨拒骸枝蔽榛莽夜半骷髏作
聲響亂離慘死非一狀不如拚身魚腹葬我今捧檄

無地投仰天獨立湖灘頭神魂惝恍不可收骷髏語
余勿歎喟吾將引子以爲類摘句五言出行云天地
皆悲動風雲正亂垂捉夫歎云奈何寬大恩豢此豺
虎軀又云吁嗟汝良民乃爲奸民奴七言圖山關渡
江云推篷落月啼孤雁按劍中流吼巨鼃送許中丞
云民命亟須防走險吏才忍再重催科懷張石卿時
被誣往黑龍江云一身投荒萬罪減聖恩豈肯連
妻孥遇姚正甫云皇天老眼未模糊我輩孤忠有臨

照皆憂時感事由青邱而上追少陵又有句云官卑氣山立又句云島夷深日覲 天朝皆獨造語其嗣

君藕生二尹秉德亦能詩有家法

畊叔都轉東鷗草堂詞二卷久已膾炙人口同治間介弟季貺太守星詒以自著勉烹詞合刊於閩中譚仲脩大令序以爲當使四方君子知填詞中有儀虞機雲云茲錄勉烹詞二首以當一臠之嘗湖上餞春高陽臺云坐綠鶯慵銜紅蝶瘦時光過了清明在苒

年華幾番醉裡瞢騰六橋烟柳牽愁慣牽不住些子
殘春任綠陰如水匆匆蕩得無痕 溟裙拾翠湖南

路有棟花開雪梅子成陰無賴啼鵲驀催歸去聲聲
東風吹遠天涯夢倚闌干芳草黃昏惱情懷千里斜
陽花亂江城秋日過青未了閣故址才媛徐昭華讀
書處壺中天云西風黃柳認當年畫閣有人曾倚背
手尋簷間步徧直恁冷清清地敗檻欺苔壞廊堆葉
畫出淒涼意花前凝立夕陽闌角紅膩 當日趁月

抽琴凭春灑翰多少閒情味一自讀書人去後風景
蕭條如此惟有青山彎彎一線猶學眉痕翠傷心臺
榭芭蕉搖得秋碎

燕山孫丹五樓餘墨偶談云入店先尋壁上詩前人
句也余頗有是癖隨在物色之山東李家店旅壁有
吳縣女史許磨令芬氏詩元韻云山程風景日荒寒
觸撥離情百不堪除是瑣瑣城畔柳依稀一樣學江
南晶奩深鎖懶梳頭脫却春衫賦獨愁鳳脰花殘官

栎急一衾殘月夢蘇州又嘉興杜若香漱芳女史和
韻云衣褪深閨半臂寒塵迷鳳髻又何堪五更促起
登車客夜色微茫斗指南羅衫冷浸月當頭生小痴
愁不解愁異日重逢諸姊妹細將情緒說皇州又挺
生和云春風淚唾不知寒卿有奇才我不堪紅燭燒
殘甘獨坐推敲字字抵雙南玉簫一曲倚樓頭吹去
行人無限愁明月滿船江水綠載將詩句過揚州又
維揚某某佚其名和云曾聞此地十分寒竊恐辱軀

去未堪夫婿有言頻慰藉宣南風景似江南征途見
雁屢回頭寄語高堂莫漫愁別後舟車無恙也兒於

重九到沂州

又餘墨偶談續編云曩於山左道上李家店旅壁鈔
錄吳縣女史許令芬原唱及諸和作刊於初編余實
未知其何如人及壬申冬返桂林周畊叔觀察以詩
函見示述及端委始知女史爲觀察如夫人也其賦
詩謠感云當代風騷重品題空山蕭艾亦無遺難成

蘇氏機中錦敢示孫郎帳下兒銀筆自羞同刻楮玉
臺應笑固然脂韋蘿汲甕貧居久那有吟情似曩時
女史雅擅詩詞兼工繪事曾以所畫墨牡丹扇見遺
云在都時丹青酬酢悉女史捉刀嗣又錄其舊作見
示秋夜卽事云曉曉疏簾暝寥寥小院局空烟疑作
雨纖月不妨星窗凝花光白燈涵竹氣青誰家弄秋
蓬鷗夢一時醒畫扇自題云昨宵微雨下莓苔石背
秋花一雨開僻徑等閑人不到虧他瘦蝶會尋來京

邱新秋病起漫興二云深院微吟日又斜風簾樹影日
參差藥鑪靜對支頤坐間數秋槐落砌花又臨江仙
詞云坐又無憇眠又悶強扶小婢間行曲房如水畫
簾明簾腰荷氣嫩窗眼竹陰清一雨新涼蘇病骨
槐花風灑疏櫺畫長持底遣閒情重鉤辭世帖細註
度人經諸作情詞婉約風調閑雅無愧作家

國初歙縣有奇女畢韜文年二十隨父宦薊邱父與
流賊戰死韜文身率精銳夜刦賊營手刃其渠與父

屍歸葬後適布衣王聖開夫婦偕隱有村居詩云席
門間傍水之涯夫婿安貧不作家明日斷炊何暇問
且攜鴉嘴種梅花

丹徒陳女史軼其名年十四詠歌風臺詩極悲壯無
一毫脂粉氣詩云擊筑歌風韻最哀白雲終古傍高
臺半生戎馬劍三尺滿目河山酒一杯父老渾忘天
子貴英雄猶戀故鄉來弓藏鳥盡嗟何及想到韓彭
惜將才

二筆載合肥徐易甫敦艮吉齋詩近於書簏中得錢
榆庵鈔示朱默存書扇詩數首默存名景昭亦合肥
三怪之一亟備錄之酬友云江淮莽千里烟塵殊無
休窮黎有才遺蕭艾盈田疇九重軫災區博采羣工
謀豈無橐筆人紛爲前席籌吾謀不足用亦爲斯民
憂生計尙不足大言徒悠悠貴賤異所趨交遊各有
偶窮思達者援正爾顏已厚高牙建大纛豈識牛馬
走昨來遇舊交憐我襟見肘綿袍聊禦寒乃出貧交

手世事有固然君今良晤否旅懷云兵後九寒食何
嘗拜墓前舊祠誰葺宇家祭已無筵靈感存頑質興
門渺後賢如閭松柏盡誌石久應填一兄離別憒兩
弟死生餘都復成荒忽何曾識起居昔猶同執業家
舊積藏書尙就湖山志茲生定不虛亦有三男子癡
頑不解愁以吾久羈旅擲汝好春秋紙筆知虛望薪
鹽庶佐籌老親應此慰遠問奈沈浮

初筆載德清戴子高詩係在金陵見示之本余手鈔

十八首中摘錄者也近見其謫塵堂遺集計文一卷
二十八篇詩二卷二百十一篇光緒元年其友趙撝叔
大令爲之刊於江西烏程施君補華爲墓表略云君
學凡三變始好爲詞章繼讀博野顏氏元之書則求
顏氏學最後至蘇州謁陳先生奐而請業焉通知聲
音訓詁經師家法復從宋先生翔鳳授公羊春秋遂
擣精覃思博志治經成戴氏論語注二十卷證文四
卷輯顏氏學記十卷管子校正二十四卷

謫廬堂遺詩所刊者與余手鈔本僅同三篇憶在金陵見示者子高所自選祇百餘篇豈此本已遺失趙君刊時未之見耶

余於壬午秋奉曾沅圃宮保檄赴廣西查勘邊防時法越構兵余有雜詩八首其末章云南服毘交趾秦漢隸版圖九眞與日南置郡同蒼梧有明始棄之俾自爲國都占臘三佛齊吞併俱膏腴近者蠭蚌爭得利誰爲漁一統復舊壤會須宏遠謀出師合滇粵分

道而疾驅仍以設郡縣形勢控海隅進戰退以守籌
餉亦有餘南洋環萬島威德可遍敷泰西或東來重
鎮未敢踰倘讓捷足登強鄰尤足虞及今而策之願
以聞當途汪芙蓉云道光中無錫丁采之玉藻才士
也有天分遙長歌亦謂明棄安南爲失策與此意正
同因出示采之西神山人詩鈔四卷天分遙歌云龍
門江上風淒淒七十二折何逶迤日南儋耳地瀕海
一水中劃分東西駱田隨潮滿規外時見螺笠秋翻

犁叢祠疊鼓賽蟲落千畝林下金釵遺鳴呼交州古
都會秦漢圖籍猶堪稽尉佗雄才略象郡樓船十萬
揚鍵旗雒民內屬百餘載何人倡亂詩索妻伏波將
軍老矍鑠至今銅柱凌丹梯永徽旣設都護府人士
結綬登王畿宋元姑息事封建李陳代嬗史所譏中
華故物不能有朱鳥牖出空招攜貪夫伏戎俄噬臍
遺民莫怨黎季犛長陵燔柴致天討特築京觀封鯨
鯢按圖盡復古郡縣功與漠北行師齊再傳餘孽又

乘駕貂璫虛饑驚蒸黎東楊西楊水蒼珮詎有遠略
陳天扉中書伴食幸無事大郡十七倫鑾夷朱鳶成
外阻王會志士搵腕聽荒雞桂林別駕今已希誰復
數典窮端倪凶墟獨行鬻鬻笑毒霧四合猩猩啼西
神山人大布衣南遊覽古空嗟歎艾山春雨一花落
白龍天矯拏雲飛

吾郡多文學之士每有所遇坎坷客死遠方姓氏亦
幾湮沒者如無錫丁采之是也其祖父皆官粵中采

之橐筆游五嶺間慷慨負奇氣尤長於詩大旨宗法少陵而能兼綜眾體曾賓谷張南山郭頻伽皆有題識年四十三卒於粵其友陽江譚竹香伯筠于同治五年爲刊行之凡古近體三百餘首近年錫金縣志竟未採入爲可慨也

采之望廬山云廬山五千仞飛翠渡江來一氣包溢浦中峰近斗魁瀑泉流歲月巖翠孕風雷白也無由見長謠獨舉杯送稽戊門之東莞云禹山秋色遠送

爾去何之落日雙忠廟寒花九姓祠家貧爲客久身
賤得名遲余亦同茲難紅亭酒莫辭廣州雜感云萬
里浮楂信壯觀扶胥日落水雲寒螺杯侑客榕陰綠
銅鼓迎神荔子丹橫浦樓船都在眼夜郎蒟醬莫登
盤斑駕一去無消息更遣唐蒙跨錦鞍我游南武已
春深始見訶梨勒果林紫鵠猶飛眾香國青蠅差慰
逐臣心東吳陵闕空荆杞上界風旛自古今余亦人
間知己少叢祠肅拜一霑襟魚藻門西晚吹涼瓊英

愁絕小南強珠空赤水蛟涎滑譙罷紅雲鵲尾長降
表殘春馳汴土故宮何處問昭陽踏青曾過呼鑾道
惟有攀枝照女牆花田寥落幾人家陌上春歸不見
花弔古擬填金縷曲含悽如過玉鈞斜靈風蕭瑟迴
衡薄鬼火淒寒出荻芽知否荒雞鳴隧道康陵小刦
使人嗟斷句如五言云衣食無恆產文章誤少年風
花愁遠客天地許高歌七言云千里關山依短劍五
更風雨撼孤舟定有文章傳奕代不應天地負斯人

皆慷慨激昂風格遒上他如過磨盤墩云亂蟬兼落
木一路送斜陽登粵秀山書梵宮壁云烟霏開五管
花雨覆諸巒贈韓珠船云離情燕草綠歸夢越山青
寄朱晉生云遠道秋風初落木空江細雨正愁人題
杭氏園云水北花南少人跡閒雲終日到柴門又何
清逸乃爾

自古畫家多工詩儀徵吳山農二尹昌烈工山水人
物今六十餘矣惟山水尙作巨幅然矜重不易得去

歲爲余作山水數幀并以其鴻雪堂牘稿見示其詩亦多題畫之作所謂詩中畫畫中詩也詩云老樹挺寒姿遙山隱夕照孤亭何寂然風竹自清嘯好景不在多心領意獨妙扁舟有客來斯人必同調又云游山不厭遠去去隨所適登陟意未窮好景豁然闢萬木含烟青數峯插天碧何處來鐘聲雲開見樓脊其他五言云海雲收宿雨江火雜殘星雲垂江岸白山接海門青落紅浮水去新綠擁山來七言僧居小病

云萬物有情皆眷屬一身無病卽神仙老樹云大匠
自求樑棟器奇材終抱雪霜姿皆佳句也

山農七絕最有神韻晉陵道中云青搖柳葉初舒眼
紅綻桃花欲破顏烟雨一帆江上路畫船人過孟城
山美酒金壺醉未曾小詩斜墨寫吳綾蒲鞋舟穩烟
波潤臥聽笙歌到晉陵每一循誦如在黃陵洛社間
益動天涯游客之感

山農詩亦多豪宕者過廣陵云路繞三江口人經百

戰場游魂歸澤國灑淚哭滄桑近郭無雞犬憑城尙虎狼雄師今已集羣寇敢鳴張自古繁華地刀兵厯刦多烟氛一掃蕩文物盡銷磨碧血餘烽火青春弔綺羅無人雪冤憤飲恨此江波其他五言云星霜孤客鬢風雪大江舟陣雲屯地黑戰血湧潮紅七言云江上故人猶有夢天涯游子已無家蕭條鄉國音書絕生死親朋涕淚多皆感愴亂離自然沈痛

余外家羅墅灣謝氏諸舅中惟厚庵先生蘭生巍然

獨存去歲以八十自壽詩寄示知其精神貞固子孫
眾多蓋作令浙中不妄笞一人故食報如此今年知
余輯故舊詩文復寄示所刻詠梅軒稿待福迎兄云
微霜欲霑衣落月猶在樹柔櫓劃波來搖入西南去
惟聞鴻雁聲回頭不知處雜興云冉冉看行雲潺潺
聽流水近在耳目前可以悟眞旨人生慕百年百年
一瞬耳驥足能追風何必盡千里未及顚蹶時可已
胡勿已舟中答鄒栗園孝廉云又作秋風客蕭蕭蘆

荻愁辭巢同社燕浪跡等沙鷗心事三更雨功名一葉舟鄉關伴殘夢夢繞幾層樓送春詞云去年故鄉送春去今年客路送春歸春來春去向何許一樣鴛鴦飛兩處江南草長鶯亂啼不怨殘紅怨飛絮望到春歸人不歸惆悵不關春去來閨詞云燈花凝睇殘焰吸角枕錦衾冷初逼并州快剪成寒衣難剪愁腸百千結雞聲入戶嬌波澀半臂春葩淚先濕感舊云澹蕩風光雨乍晴偶然攜屐出間行十年舊侶同雲

散二月春愁似水生竹筍抽時來語燕柳陰深處囁
流鶯落花芳草皆陳迹獨立蒼茫無限情送春云湧
跡逢春不當春青袍常染落花塵子規枉自啼聲苦
只喚春歸不喚人摘句五言如學圃吟云手足非不
勞日夕無外慕又云旣醉樂陶然夢游天地初毘陵
道中云細雨延陵墓春風泰伯城舟中云山川催客
老冰雪入詩清七言感興云酒逢勝侶恆先醉書到
中年半已忘又云三秋常苦風兼雨九月還驚水接

天白桃花云露井月明空顧影夜涼獨自倚闌干先
生長子昌霖字雨亭久令閩中亦能詩詞

詠梅軒稿上已日脩禊蘭亭集字成五律云禊事今
猶昔欣將陳迹脩水隨諸嶺合林抱一亭幽興至因
生慨時和足快遊況當天氣朗觴咏信風流其二云
放情知自得不異永和賢所遇雖殊致幽懷亦暢然
山林欣此日絲竹感流年暫與同人樂無虛春暮天
頗不爲集字所窘

謝氏在元時有龜巢先生名應芳字子蘭至正初隱白鶴溪史有儒林傳近年脩武陽合志改入義行署論譁然蓋當事者自奢其例無類可歸好逞臆見遂不免指摘云

謝氏自明初遷羅墅灣者名哲字士賢嘗受業從祖應芳講學里門文行冠一時弟芳成進士授刑部主事出爲浙鹽運使卒于官宦橐蕭然哲以所有盡畀其孤徙居羅野灣茅屋數椽讀書談道一秉應芳之

學子孫蕃衍實基於此

羅墅灣跨孟瀆河有河東河西之分余外家一支居河東之南村孟瀆北通大江南至奔牛入運河奔牛鎮古名金牛龜巢稿有登金牛臺七古云六龍城西呂城東奔牛古堰卧兩虹誰築高臺水中沚野有蔓草牛無蹤至今雙虹猶在臺則不復覩矣

吾郡聚族鄉居以科名仕宦著稱者羅墅灣謝氏外又有薛墅巷吳氏吳氏入本朝始盛有青城先生

者名馮栻康熙六十年進士入詞館年已六十餘其
明年正月初五日卽與子叟宴應 制詩云微臣釋
褐甫登瀛旋待瀛仙宴太清瑞應早於天象見老人
星拱泰階平又第三首云初步木天逢曠典萬年春
酒慶昇平其裔孫子貞參軍需次粵中爲余誦之且
言尙有青城說杜一卷舊曾刊行云

余在都門晤同邑謝方山駕部後于役桂林知其地
有謝清之司馬卽方山弟也蓋謝氏之寓嶺右久矣

近見餘墨偶談載風洞山小集謝氏昆仲各有詩方
山詩云十五年來一瞬過舊題詩處石嵯峨青山對
我曾相識白酒逢人又放歌迢遞風烟餘瘴癘亂離
歲月付干戈異鄉幸共菜萸會無那登高感慨多清
之於去歲歿於龍勝倅署云

臨桂李燕伯孝廉受彤初爲宣化縣學官卽以廉幹
稱光緒五年由都察院遞奏時事八條奉 旨採擇
施行旋以州牧發廣東近與往還頗稔題余粵西游

草七古長篇前幅云祖龍置郡闢桂林炎荒遠在天
之畔中朝達官至者稀其有至者多謫竄唐宋而來
風會開山水逢人得月旦中幅云考文徵獻詳民風
究委尋源一以貫古詩三百非漫爲小述性情大治
亂又云湖光海色孕碧虛珊瑚明珠互璀璨用筆排
宕惟嫌溢美耳

二筆載陳象九大令繪寄灕江秋泛圖嗣由澄邁返
省見示障甌齋詩草益可徵鄭虔三絕矣間詠云行

捐草頭露坐遲蕉下風春來人未覺初見小桃紅爲友人題採菊思親圖云採菊爲延年親年不我待同深陟屺悲伸紙淚痕在潮州西園云芭蕉濃襯老榕青樓閣參差敝畫櫺最喜雨餘殘暑退綠荷香繞沁心亭斷句五言云長夜孤燈影空階落葉聲濕雲低渡水薄霧忽移山春草綠浮地木棉紅到天地迥數峯出天空獨鳥飛七言云白鳥行邊孤塔見青山缺處晚霞明散子魚搖春水活試飛燕弄午風柔潮州

文公祠云唐代文章尊北斗韓山俎豆重南天惠州
西湖云四面亂山雙塔古幾行疏柳六橋秋他如攬
頭早行云幾家村郭綠陰裏風捲飛花上酒帘鳳城
晚泊云涼夜迢迢秋似水豔情空負六篷船皆風韻
絕佳